

9-may - Xotira va qadrlash kuni

www.tongyulduzi.uz

Vatan yagonadir,
Vatan bittadir!

N:18 (66975)

2014-yil

5-may



Gazeta 1929-yil 1-avgustdan chiqq boshlagan

O'zbekiston Respublikasi bolalar va o'smirlar gazetasi

ISSN - 2010-6092

INSON - AZIZ, XOTIRA - MUQADDAS

Bu muqaddas Vatanda inson aziz, xotirasi undan-da aziz. O'tganlarni yod etish, nuroniylarni e'zozlash, ardoqlash, hurmatini joyiga qo'yish, cheksiz ehtirom ko'rsatish xalqimizga xos oliy-janob fazilatlardandir.

Keksa avlodga ko'rsatilayotgan e'tibor Istiqlol yillarida davlat siyosati darajasiga ko'tarildi. Yurtimizda 9-may - Xotira va qadrlash kuni sifatida nishonlanishi yuqoridagi fikrimiz isbotidir.

(Davomi 2-betda)

«FAVVORALAR SAYLI» - SHUKRONALIK AYYOMI

1-may kuni Toshkentda «Favoralar sayli» yoshlar ommaviy-madaniy bayram tadbirlari bo'lib o'tidi. Shu kuni poytaxtimizdagi tadbirlar o'tkaziladigan favvoralar atrofida umumta'lim maktablari, akademik litsey va kasb-hunar kollejlari o'quvchilari, Zulfiya nomidagi Davlat mukofoti sohibalari, xalqaro sport musobaqalari, san'at festival-lari, fan olimpiadalari g'olib va sovrindorlari, oliy o'quv yurti talabalari, ustoz murabbiylar, shahrimiz mehmonlari jam bo'lishdi. O'zbekiston Respublikasi Vazirlar Mahkamasining 2014-yil 23-aprel-dagi «Toshkent shahrida «Favoralar sayli» yoshlar ommaviy-madaniy tadbirlarini tashkil etish chora-tadbirlari to'g'risida»gi qaroriga muvofiq o'tkazilgan bayram sayli yurtdoshlarimizga olam-olam zavq ulashdi.

(Davomi 2-betda)



INSON – AZIZ, XOTIRA – MUQADDAS

(Davomi. Boshi 1-betda)

Kuni kecha muhtaram Prezidentimizning «Ikkinchi jahon urushi qatnashchilarini rag'batlantirish to'g'risida»gi Farmoni urush qatnashchilari qatorida barcha



hamyurtlarimizni xushnud etdi. Keks avlodga ko'rsatilayotgan bunday izzat-ikrom, yuksak ehtirom qalblarimizni faxr-iftixorga to'ldirdi.

Bayram arafasida Ikkinchi jahon urushida qatnashgan otaxonlar bilan dildan suhbatlashdik. Ular orasida poytaxtimizning Uchtepa tumanida – farzandlari e'zozida yashayotgan, «Jasorat» medali sohibi 90 yoshli Hamid bobo ham bor. Otaxon biz bilan suhbatda bugungi tinch, osoyishta kunlarga shukronalar aytidilar. Vatandan faxrlanish hissi ko'zni ham, qalbni ham yashnatadi, dedilar. Biz esa Hamid boboga sog'lik-salomatlik tilab, Xotira maydoni tomon yo'l oldik.

94 bahorni qarshilagan Sobir

bobo Musayev va uning evarasi, poytaxtimizning Uchtepa tumanidagi 197-maktabning 8-«D» sinf o'quvchisi Shorasul Shomaq-sudovni shahrimiz markazidagi Xotira maydonida uchratdik. Ota maydondagi mangu olov yodgorligi oldida turib, beixtiyor «Xotira – muqaddas», deya pichirladi. So'ngra, bobo va evara Motamsaro ona haykali qarshisida ta'zim qilishdi. Ota xiyobon ayvonidagi tokchalar yoniga borganida, yuzida shukronalik zohir edi. Ikkinchi jahon urushida bugungi dorulamon kunlarimiz uchun jonlarini ayamagan qurol-doshlari-ni-ning ism-sharifini o'qib, shunday mard, jasur do'stlari bo'lganligidan faxrlandi.

1946-yil 1-mayda turmush qurishgan Sobir ota Musayev va Rupiya aya Musayeva 8 nafar – 6 qiz, 2 o'g'il farzandni tarbiyalab voyaga yetkazishdi. Eng to'ng'ich farzandlari Vazira opa 66 yosh, eng kichik farzandlari Dilorom opa 50 yoshga kirdi. Bugungi kunda 27 nabira, 42 evara ardog'ida keksalik gashini surishmoqda.

Shorasulga qarata: – Bilginki, bugungi tinch, farovon hayotimizda bu insonlarning hissasi beqiyos. Shunday ekan, Vatanimizning farovon kelajagi va iqboli uchun yashash, kurashish eng katta baxt, – dedi ota ko'zlarida yosh qalqib.

Sobir ota ko'zlaridagi yoshni artib, uzoq xayolga berildilar. Kim bilsin, o'sha damda qurol-dosh do'stlarini yana bir karra xotirlagandir. Biz ham otaga savol berib, uni ortiqcha bezovta qilmadik, ammo o'zimiz ham bir zum o'zga toldik.

Tinchlik bor ekan, dillarda nur, qalblarda orom, ko'ngillarda xotirjamlik bo'lavevadi. Zero, tinchlik, eng avvalo, bolalarning baxti, yoshlarning baxtiyorligi, onalarning saodati-yu keksalarning osoyishtaligidir.

Feruza ADILOVA

«FAVVORALAR SAYLI» — SHUKRONALIK AYYOMI

(Davomi. Boshi 1-betda)

Mustaqillik yillarida mamlakatimizda bunyodkorlik va obodonchilik ishlariga alohida e'tibor qaratildi. Nafaqat muhtasham binolar qurilishiga, balki ular atrofida go'zal landshaft, tabiiy muhit yaratishga katta ahamiyat berilmoqda. Ayniqsa, o'tgan yillar davomida favvoralar bunyodkorlik loyihalarimizning muhim



tarkibiy qismiga aylandi. Poytaxtimizdagi «Mustaqillik maydoni», Ma'rifat markazi va Simpoziumlar saroyi, Amir Temur muzeyi, O'zbek davlat sirki, «Interkontinental» mehmonxonasining kirish qismidagi favvoralar bugun shahrimiz ko'rkiga ko'rk qo'shish bilan birga, yurtdoshlarimizning eng sevimli maskanlariga aylandi.

Bayram kuni biz ham Xadra maydonida o'tkazilgan tantanalarda ishtirok etdik. Muazzam maydondagi 12 metr balandlikka ko'tariladigan, rang-barang jilolar yog'dusida jilolanadigan favvora yonida tashkil etilgan tadbirda milliy-madaniy qadriyatlarimizga alohida urg'u berildi. O'quvchi-yoshlarning ijodiy ishlari

asosida ko'rgazmalar tashkil etildi, o'yin maydonchalari esa jazzi bolajonlar bilan gavjum bo'ldi. Ayniqsa, dorbozlar, sirk ustalarining betakror chiqishlari, san'at ustalarining diltortar qo'shiqlari tadbir ishtirokchilariga bayramona kayfiyat ulashdi.

– Bugungi sayilda ishtirok etib, olam-olam zavq oldim, – deydi poytaxtimizning Shayxontohur tumanidagi 299-umumta'lim maktabining 8-«B» sinf o'quvchisi Biloliddin Qodirov. – Bo'sh vaqtlarimda rasm chizishni yoqtiraman. Hozir ham Xadra maydonidagi mana bu go'zal favvora va uning atrofida bayramni xush kayfiyat bilan nishonlayotgan yurtdoshlarimning rasmini chizayman.

Suv – poklik, soflik ramzi, tiriklik manbaidir. Uning har tomchisida hayot jilvalanadi. Shu bois, azal-azaldan ota-bobolarimiz suvni muqaddas bilib, uni e'zozlaganlar.

Tibbiyot mutaxassislarining ta'kidlashicha, favvoralar oldida sayr qilish inson salomatligiga ijobiy ta'sir ko'rsatir ekan. Suv insondagi toliqishni oladi, tanaga tetiklik baxsh etadi, kayfiyatni ko'taradi, asabni tinchlantiradi.

– Istiqloq yillarida mamlakatimiz bunyodkorlik markaziga aylandi. Ayniqsa, poytaxtimiz tanib bo'lmaz darajada chiroy ochdi, – deydi Toshkent shahridagi 13-umumta'lim maktabi direktori Nargiza Ziyayeva. – Keng va ravon yo'llar, muhtasham binolar, mustahkam ko'priklar, betakror favvoralar poytaxtimizga ulug'vorlik baxsh etib turibdi.

Shu kuni o'tkazilgan «Favvoralar sayli» yoshlik, shukronalik, shod-u xurramlik bayramiga aylandi. Unda ishtirok etgan yurtdoshlarimiz qalbida ona Vatanga muhabbat tuyg'ulari jo'sh urdi.

Sa'dullo TURSINOV

KAMALAK BILIMDONLARI

Bugun yurtimizda kelajak egalarining har tomonlama barkamol, yetuk shaxs bo'lib voyaga yetishlari, shuningdek, ularning o'z iqtidor va qobiliyatlarini namoyon etishlari uchun keng imkoniyatlar yaratilgan. Bunda ular o'rtasida muntazam o'tkazib kelinayotgan turli ko'rik-tanlovlarning o'zni beqiyos.

Yaqinda Navoiy shahridagi «Yoshlar markazi»da «Kamalak» bilimdonlari ko'rik-tanlovining respublika bosqichi o'tkazildi. Ushbu tanlovda yurtimizning barcha hududlaridan kelgan 10 yoshdan 14 yoshgacha bo'lgan bolalarning 14 jamoasi «Taqdimot», «Sahna ko'rinishi», «Savol-javob», «Ijtimoiy loyiha» kabi yo'nalishlarda o'zaro bellashishdi.

Yakuniy natijalarga ko'ra, I o'rin Zarafshon shahridagi 2-umumta'lim maktabining «Kamalak» yog'dulari jamoasiga, II o'rin Farg'ona viloyati, Uchko'priktumanidagi 1-ixtisoslashtirilgan umumta'lim maktabining «Kamalak» bilimdonlari hamda III o'rin Toshkent viloyati, Bekobod tumanidagi 11-umumta'lim maktabining «Barkamol avlod» jamoasiga nasib etdi va g'olib jamoalar tashkilotchilar tomonidan «Kamalak» kubogi, maxsus diplom va esdalik sovg'alari bilan taqdirlanishdi.

– Garchi g'oliblikni qo'lga kiritir olmagin bo'lsak-da, jamoamiz bilan bundan aslo xafa emasmiz. Chunki bu yerga kelgan tengdoshlarimiz bilan fikr almashdik, do'stlar orttirdik. Shuningdek, Navoiydek go'zal shaharni ko'rish baxtiga muyassar bo'ldik, – deydi Andijon viloyatining Jalaquduq tumanidagi 7-umumta'lim maktabining «Kamalak» yulduzlari jamoasi ishtirokchisi Oydiyov Bahriddinova.

Munira NARZIYEVA,

Ozoda SHUKURBOYEVA, Navoiy viloyati

YURTNING SODIQ O'G'LONI

Vatanimiz ozodligi va mustaqilligi yo'lida jon fido qilgan qahramonlar orasida yurtimizning mard va jasur o'g'loni Boburjon G'aniyev ham bor.

Harbiylar oilasida tug'ilib voyaga yetgan Boburjon yoshligidan otasi Abduhamid aka singari harbiy askar bo'lishni orzu qildi. U Marg'ilon shahridagi «Yo'mado'z» mahallasida joylashgan 13-umumta'lim maktabida a'lo baholarga o'qidi, mudofaaga ko'maklashuvchi «Vatanparvar» tashkilotida tahsil oldi.

Leytenantlik unvonini olgan Boburjon G'aniyev safdoshlari bilan birga, ona Vatanimizning har qarich tuprog'ini yov hamlasidan himoya qildi. Afsuski, dushman bilan bo'lgan janglarning birida o'q yo'lga g'ov bo'lgan leytenant og'ir yarador bo'ldi. Shunda ham ortga chekinmay, qurolidoshlari xavfsiz joyga o'tgunga qadar jangarilarga qarshilik ko'rsatdi, so'nggi nafasigacha bosqinchilar bilan mardonavor olishdi.



Boburjon yashagan xonadonda «Kamolot» YOIH shahar Kengashi tashabbusi bilan uy-muzeyi tashkil etilib, yodgorlik lavhasi o'rnatilgan. Avvalgi Ibrat ko'chasiga Boburjon G'aniyev nomi berilgan. Xalqimiz osoyishtaligi, yurtimiz tinchligi yo'lida jon fido qilgan bunday jasur o'g'lonlar xotirasi hech qachon unutilmaydi.

Muhammadjon MAHMUDOV,
Farg'ona viloyati



Bobojonimning ajoyib bir odati bor. Ular jajji bolajonlarni xursand qilishni yaxshi ko'radilar. Shirinliklardan tashqari bizlarga gazeta-jurnal ulashadilar. Menga ilk bor «Tong yulduzi» gazetasini o'qib bergan ham ular. Men, ayniqsa, bobojonimning bir-biridan qiziqarli hikoyalarini, o'tgan umrlari bilan bog'liq xotiralarini tinglashni yaxshi ko'raman.

Onam ham doim «Bobongni hurmat qilgin, ularga o'xshashga, maktabda a'lochi, faol o'quvchi bo'lishga harakat qilgin», deyilar. Katta buvanning o'zlari esa

Har yili Xotira va qadrlash kuni Murtazo bobomning tug'ilgan kunlarini nishonlaymiz. Shu sababli, o'yijonim bu sanani «Qo'shaloq ayyom», deyilar. Bayram kuni katta hovlida barcha yaqinlar yig'ilib, bobomni tabriklaymiz, nevara-yu evaralar she'r-qo'shiqlar aytib, ularni xursand qilamiz.

BOR BO'LING

chiroyli va zamonaviy maktablarda o'qib, o'ta-onamizning bag'rida tinch-xotirjam ulg'ayayotganimiz uchun shukur qilishimiz zarurligini uqtiradilar. Shunda men «Shukur, buvajon, boringizga shukur, katta bo'lib, sizga o'xshagan zo'r odam bo'lganimda, meni duo qilib turing», desam, «O'zimning qaqqajon evaramdan o'rgilay», deya quvonib bag'rilariga bosadilar.

Ushbu maqolamni gazetada o'qib, yanada xursand bo'ladilar. Fursatdan foydalanib, bobojonim va barcha buvi-buvajonlarga, baxtimizga hamisha sog'-salomat bo'linglar, degim keladi.

Javohir BILOLOV,
poytaxtimizning Chilonzor tumanidagi
103-umumta'lim maktabining 1-sinf o'quvchisi

XOTIRA — ABADIYAT BELGISI

Keksa buva-yu buvilarimiz, bugungi tinch hayotning qadriga yetinglar, biz ko'rgan kunlarni aslo ko'rmanglar, deya bot-bot takrorlashadi. Biz ham ularning o'g'itlariga amal qilib, osoyishta o'tayotgan har bir kunimizga shukronalar aytamiz.

Har yili Xotira va qadrlash kuni arafasida poytaxtimizdagi «Xotira maydoni»ga o'qituvchimiz bilan ziyoratga boramiz. U yerdagi «Motamsaro ona» haykali poyiga gullar qo'yamiz. Ustozlarimiz ota-bobolarimizning ko'rsatgan jasoratlarini, qahramonliklari haqida so'zlab, xotira abadiyat belgisi ekanini ta'kidlaydilar. Darhaqiqat, xotira bor ekan, ajdodlarimizning jasoratlarini qalblarimizda mangu yashaydi.

Setora PARDAYEVA,
Toshkent shahar, Chilonzor tumanidagi 131-umumta'lim maktabining 7-«V» sinf o'quvchisi

Poytaxtimizning Yunusobod tumanidagi 302-umumta'lim maktabida shoir Rustam Musurmon bilan uchrashuv bo'lib o'tdi.

MAKTABDA UCHRASHUV

Tadbirni ochib bergan maktabning jonkuyar ustozlaridan Nodira Yusupova va Munavvara Murodova dastlab adabiyot va she'riyatning bolalar ijodiy qobiliyatini shakllantirishdagi o'rni haqida gapirib, so'z navbatini tadbir mehmoniga berdi.

Shoir o'zining she'riyat olamiga kirib kelgan yillari, hamkasb do'stlari to'g'risida so'zlab berdi. Ayniqsa, O'zbekiston xalq shoiri Muhammad Yusuf bilan bog'liq xotiralarini yig'ilganlarda katta taassurot uyg'otdi. Shoirning ona Vatanni sevish, kattalarni hurmat, kichiklarni izzat qilish mavzusidagi she'rlari olqishlar bilan kutib olindi.



Shuningdek, tadbirga qizg'in tayyorgarlik ko'rgan o'quvchilar adabiyot darsida yod olgan she'rlarini o'qib berishdi. Ular tomonidan ijro etilgan sahna ko'rinishlari, kuy-qo'shiqlar esa davraga yanada fayz ulashdi. Ayniqsa, 8-«A» sinf o'quvchilaridan Sardor Jo'rayev, Laylo Oripova, Amirbek Nazarboyev, Zulfiya Karimovanning faol ishtiroki ko'pchilikning e'tirofiga sazovor bo'ldi.

Tadbir so'ngida she'r mashq qilishga qiziquvchi bolalar shoimni savollarga tutib, o'zlari uchun kerakli maslahatlarni olishdi.

Muzaffar AHMEDOV,
Suratlar muallifi: M. AZIMOV

KINO VA YOSHLAR

Ayni shu kunlarda «Kamolot» yoshlar oromgohida «Kino va yoshlar» mavzusida Respublika Forumi bo'lib o'tmoqda.

Bunday Forum yurtimizda ilk bor tashkil etilayotgan bo'lib, tadbir oldidan «Kamolot» YOIHining internet saytida alohida sahifa tashkil etildi va yoshlardan kinoga doir savollar hamda sohani rivojlantirishga qaratilgan takliflar yig'ildi. Quvonarlisi, internet orqali o'n besh mingdan ortiq tengdoshlaringiz bugungi o'zbek kinosining saviyasi, mavjud muammolar yuzasidan o'zlarining fikr-mulohazalarini bildirdilar. Ularning ko'pchiligi hozirda yaratilayotgan kinolarimizning aksariyati bir qolipga tushib qolgani, ssenariylarning mazmunan sayozligi, qolaversa, yosh aktyorlarimizga bilim, saviya va tajriba yetishmasligini ta'kidladilar.

Forum yakunida yosh kinoijodkorlarni qo'llab-quvvatlash bo'yicha me'yoriy-huquqiy hujjatlar qabul qilish, yoshlarning ijtimoiy faolligini oshirish, «Kamolot» YOIH boshlang'ich tashkilotlari yetakchilari faoliyatini keng targ'ib qilishga qaratilgan badiiy film yaratish bo'yicha takliflar tayyorlandi. Shuningdek, Forum ishtirokchilari tomonidan bildirilgan fikr-mulohazalar asosida kino san'atini yanada rivojlantirish hamda yosh kinoijodkorlarni qo'llab-quvvatlashga qaratilgan Dastur ishlab chiqish belgilab olindi.

O'z muxbirimiz

EL HECH QACHON UNUTMAYDI

*Elning otashnafas shoiri Muhammad Yusuf haqida aytilmagan jo'yali so'z
qolmagan bo'lsa kerak, degan xayolga bordim.*

O'ylab ko'rsam, shoirning hali ochilmagan qirralari juda ko'p ekan. Borliqni jon-u dilidan suyib ardoqlagan betakror iste'dod egasi Muhammad Yusufning ona tabiat bilan bog'liq bo'lgan mahzun she'rlari bir dunyo edi. Go'yo u hozir yuksak cho'qqilar boshida kiyiklarning izidan ergashib:

Erka kiyik, maylimi bir erkalasam?..
deya iltijo qilayotgandek tuyuladi. Yoki qirlarning bag'riga loyullab chiqqan bag'ri xun lolaqizg'aldoqlarga o'ychan:

Peshonangdan o'pay desam, peshonang yo'q...
kabi iztirobli satrlari ixlosmandlar qalbida behisob ezguliklar urug'ini sochib ketgani sir emas. Uning xalqona ohangda yaratilgan satrlari bugun hosilga kirdi, desak xato bo'lmaydi.

Yaqinda Toshkent shahri, Bektemir tumanidagi 289-umumta'lim maktabida o'tkazilgan anjumaning boshlanishida endigina 5 yoshni qarshilagan qizaloq Ruxshona Qurbonova: *Lola, lolajonim, lolaqizg'aldoq...* she'rini shunchalik mahorat bilan o'qidiki, beixtiyor ko'zlarimda yosh qalqidi. O'yladim, haqiqiy shoir, yetti yoshdan yetmish yoshgacha bo'lgan barcha qalblarni birday zabt eta



dadir.

Kuni kecha Muhammad Yusuf yashagan Toshkent shahar, Mirzo Ulug'bek tumani, Pushkin-Solor ko'chasidagi 1-uyda shoira ehtirom tarzida yodgorlik lavhasi o'rnatildi. Barcha qalblarda birdek mehr qozonish baxtiga muyassar bo'lgan shoirimizni el hech qachon unutmaydi...

olarkan. Davlatimiz rahbarining qaroriga asosan, shoirning oltmish yillik ijodiy kechalari joylarda ko'tarinki ruhda o'tdi. Bugun shoir kezman ko'chalar, u o'qigan maktab, yashagan qishloq va hovli, qizg'aldoqlarga burkanib yotgan tabarruk tuprog'igacha elning nazari-

AXTAMQULI

Omon bobo 90 yoshga to'lishi munosabati bilan bo'lib o'tgan qutlov kechasida ruhi har qachongidan tetik edi. Tabriknomalarni o'qib, o'zini qo'yarga joy topolmasdi. Ayniqsa, quroldosh do'sti Bozorboy bobo O'rolovning dastxatini o'qib, beixtiyor olovli jang xotiralari ko'z o'ngida gavdalandi.



FIDOKORLIK KO'RSATIB...

Omon Shoyzoqov Ikkinchi jahon urushida quroldosh do'stlariga ibrat ko'rsatdi. U urushning so'nggi kunlarigacha safda bo'lib, o'zining mard va jasur yurt o'g'loni ekanini isbotladi.

Bobo urushdan so'ng uzoq yillar G'allaorol tumanida qishloq fuqarolar yig'ini raisi lavozimida faoliyat yuritib, qishloqlarni obodonlashtirish, aholini turar-joy bilan ta'minlashga o'z hissasini qo'shdi.

Urush va mehnat faxriysi Omon bobo Shoyzoqov va turmush o'rtog'i Xosiyat momo o'n bir nafar farzandni voyaga yetkazishdi. Hozirda ular turli sohalarida samarali mehnat qilishmoqda. Otaxon 90 yoshda bo'lsa ham tetik va bardam. Tez-tez tumanidagi 42- va 44-umumta'lim maktablari o'quvchilarining aziz mehmoni bo'lib, ularni mard, jasur bo'lishga da'vat etadi.

Feruza ABDULLAYEVA,
Jizzax viloyati

DO'STLARGA ATALGAN GUL

*Yaqinda tog' qishloqlarining birida bo'lib,
u yerdagi Kotira bog'ini ziyorat qildim.*

Shu payt yonimga nuroniy bir otaxon keldi-da, qo'llaridagi gulni yodgorlik poyiga qo'yib, ancha vaqtgacha sukut saqlab turdi.



Otaxon bilan tanishib olgach, u meni soy bo'yida savlat to'kib turgan azim chinor tagidagi o'rindiqqa taklif qildi. Uning suhbatga mushtaq ekanligi yuz-ko'zidan sezilib turardi.

Suhbatdoshim 40 yoshda urushdan g'alaba bilan uyga qaytib kelganliklarini, yodgorlikka gul qo'yilgan kun otaxonning tug'ilgan kuni ekanligini, uning ko'p tengqurlari Ikkinchi jahon urushida halok bo'lganini so'zlab berdilar.

Urushda halok bo'lgan, ona Vatani uchun jon fido qilgan do'stlarimiz, ota-bobolarimizni yod etishimiz ularning nomi hamisha barhayot ekanligini anglatadi, deya otaxon uzoq xayolga cho'mdilar.

Sarvar MURODOV,
Qashqadaryo viloyati, Yakkabog' tumanidagi
79-umumta'lim maktabi o'quvchisi

BOBOMDEK BO'LAMAN

*Alisherlarning oilasida yaxshi an'ana bor. Har yili 9-may - Kotira va qadrlash
kuni arafasida bobosi Muhammadjon otaning hovlisida yaqin qarindoshlar jam bo'lib,
buvijonlari Farizaxon ayaning to'kin dasturxonini atrofida mehmon bo'lishadi.*

Ayniqsa, buvisidan bobosining Ikkinchi jahon urushida ko'rsatgan qahramonliklari haqidagi xotiralarni tinglaganda, ularning harbiy kiyimdagi suratlarini tomosha qilganda, Alisher tinchlikning naqadar qadrligi ne'mat ekanligini his etadi.

Buvisining aytishlaricha, bobosi Muhammadjon ota Hotamov 1940-yili harbiy xizmatga chaqirilgan. Askarlik burchini o'tash jarayonida uchuvchilarni tayyorlash kursida tahsil olgan. Urush boshlanib qolgach, bobosini harbiy samolyot uchuvchisi sifatida

jangga yuborishgan.

Bobosining mardliklari haqidagi hikoyani qiziqib tinglar ekan, Alisherning ko'z oldida osmonni to'ldirib uchib borayotgan harbiy samolyot va uni boshqarayotgan buvasining mardonavor chehrasi namoyon bo'ldi. Shunday jasur, mard kishining nabirasi ekanligidan faxrlandi, qalbi g'urur va iftixorga limmo-lim to'ldi. «Men ham maktabni tamomlab, harbiy xizmatga boraman. Xuddi buvamdek jasur askar bo'lib, ona Vatanimga xizmat qilaman», deb niyat qildi.

– Tinchlik – eng ulug' ne'mat, – deya so'zlarini yakunladilar buvijonlari. – Yaratganga shukur, osmonimiz musaffo, turmushimiz osuda, dasturxonimiz to'kin. Bolajonlarim, shunday tinch, farvon hayotning qadriga yeting. A'lo baholarga o'qing. Kelajakda buvangiz orzu qilgandek, ilmi, kasb-korli, mehnatkash, ajdodlarimizga munosib voris bo'lib yetishing. Bu kun juda maroqli o'tdi. Buvisidan eshitgan xotiralar Alisherni to'liqlantirib yubordi va maktabga borganida bu haqda o'rtoqlariga ham so'zlab berishga qaror qildi.

Dilorom HOTAMOVA



SAN'ATGA OSHUFTA QALBLAR

O'tgan haftada O'zbekiston Badiiy akademiyasi Markaziy ko'rgazmalar zalida bo'lib o'tgan san'at festivalidan xabaringiz bor. Bugun sizlarni «Sog'lom bola yili»ga bag'ishlab o'tkazilgan mazkur tadbirda ishtirok etgan ayrim tengdoshlaringiz bilan yaqindan tanishtiramiz.

– Men Benkov nomidagi Respublika rassomlik kollejining «Tarixiy liboslar» yo'nalishida tahsil olaman, – deydi Zilola Abdvohidova. – Bu festivalga XVII asrda Fransiya ayollarining Rokokostil ko'rinishidagi libosini hamda yapon ayollarining kimonosini tayyorlab keldim. Ushbu ijod namunalari yaratishimda ustozim yaqindan yordam berdi.

Tasviriy san'at festivaliga tashrif buyurgan hindular qabilasini ko'rib, biroz hayratlandik. Ayniqsa, ular ijrosidagi raqslar barchada o'zgacha taassurot uyg'otdi. Biz bu libosni yaratish fikri qayerdan paydo bo'lganligini bilish maqsadida, libos dizayneri bilan suhbatlashishga shoshildik:

– Yoshligimdan hindular hayotiga juda qiziqaman, – deydi Benkov

nomidagi Respublika rassomlik kollejining 3-bosqich o'quvchisi Shahlo Mirzohidova. – Hindular ishtirokidagi filmlarni tomosha qilishni yaxshi ko'raman. Ularning hayoti, turmush tarzi haqidagi kitoblarni esa katta qiziqish bilan mutolaa qilaman. Ana shu jihatlar liboslarni yaratishimda menga yaqindan ko'mak berdi.

Liboslar namoyishidan so'ng bino bo'ylab aylanarkanmiz, u yerda rasm chizayotgan, yog'ochdan buyum yasayotgan, ajoyib zirag-u bilaguzuklar tayyorlayotgan, gilam, gobelen to'qiyotgan, haykal yasayotgan, qo'yinki, o'z hunarini namoyish etayotgan yigit va qizlarni ko'rib, yurtimiz chinakam iste'dodlar mamlakati ekaniga yana bir

bor ishonch hosil qildik. Diqqatimizni turli haykalchalar yasayotgan o'quvchilar

yaxshi ko'radi. U o'zi yasayotgan haykalda milliy o'yinlarimizdan biri «Ko'pkari»ni jonlantirishga harakat qilgan.

– Maktab-internatimizda iqtidorli o'quvchilar juda ko'p. Haykaltaroshlik yo'nalishi bo'yicha tahsil olayotgan Otabek Baxtiyorov, Asadbek Ulfatov, Ziyodulla Jo'rayev, Ibrohim Hojiakbarov, Umar Hasanov singari o'quvchilarim bilan haqli ravishda faxrlanaman, – deya so'zini yakunladi ustoz.

Festival davomida nogiron bolalar uchun xayriya tadbiri tashkil etildi. Shuningdek, ijod sohasida izlanayotgan, bor mahoratini ishga solib, ko'zni quvnatadigan buyumlar yasayotgan o'quvchilar o'z san'at namunalari taniqli rassomlar-u haykaltaroshlarga ko'rsatib, ularning maslahatlaridan bahramand bo'lishdi. Festivalda taniqli rassomlar, haykaltaroshlar, zargarlar ishtirokida o'quvchilarga «Mahorat maktabi» ham tashkil etildi.

Ozoda
TURSUNBOYEVA.
Suratlar muallifi:
Z. NISHONOVA



Read the following funny story and translate it into Uzbek. And try to retell it to your friend.

IT DOESN'T MATTER

Zilola is a very little girl. She is only five. She doesn't go to school and of course she doesn't know how to read and to write. But her sister Nafisa is a schoolgirl. She is ten.

One day she sees her little sister at the table with a pen and a big sheet of paper in front of her:

«What are you doing, Zilola?»

– Nafisa asks. «I am writing a letter to my friend, Dilnoza».

– Zilola answers. «How can you, you don't know how to write?» – Nafisa asks. Zilola answers: «It doesn't matter, because, my friend Dilnoza doesn't know how to read».


New words:

Doesn't matter – muhim emas.

Of course – albatta.

Sheet of paper – bir varaq qog'oz.

How can you – qanday qilib.



INGLIZ TILINI O'RGANAMIZ! LET'S LEARN ENGLISH!

Aziz o'quvchilar, ingliz tilida «ko'p» yoki «kam» olmoshlari qaysi holatda qanday aytilishini bilasizmi? Bilmasangiz, keling, birgalashib o'rganib olamiz.

Much – ko'p
Little – kam


For example: I have much sugar.
Anvar reads little.

Many – ko'p
Few – kam

For example: Lola has got many English books.
There are few pupils in the classroom.

A lot of – ko'p, umumiy sanaladigan va sanalmaydigan otlardan oldin ishlatiladi.

For example: There are a lot of doors in our house.
There are a lot of water in that dish.
Esingizdami, Have/has got (ega bo'lmoq) va there is/are birikmalarini gazetamizning avvalgi sonlarida o'rgangan edik. Ushbu so'zlar aynan shu birikmalar bilan ko'proq ishlatiladi.



For example: I have got many flowers at home.

There are a lot of houses in this steet.
She has got few pens.
Anvar has little experience.

Joke (latifa)

Teacher: – Sardor, go to the map and find North America. (O'qituvchi: – Sardor, xaritani oldiga borib, Shimoliy Amerikani top-chi).

Sardor: – Here it is! (Mana u!)

Teacher: – Correct. Now, Bobur, who discovered America? (To'g'ri. Bobur, Amerikani kim kashf qilgan?)

Bobur: – Sardor!



Proverb (maqol)

Better to do well than to say well. (Gap bilguncha ish bil).

Practice makes perfect. (Taktirash bilimning onasi).

O'ZDJTU talabasi
Dinara SHAKIROVA tayyorladi

SOG'INDIM

Sog'indim mehr oshyon ko'zlarigizni,
Yuragim qo'msaydi so'zlarigizni.
Afsus, topolmayman izlarigizni,
Qaydasiz mehribonim, poyi rizvonim?!
Diydori lahzalik mangu armonim!

Mana, bahor keldi, gulladi bog'lar...
Yana yashnar bo'ldi gul-u rayhonlar.
Bag'ringizni qo'msab dilimda dog'lar,
Qaydasiz jon-jahonim, mehri ummonim,
Duo tilar ko'kdan jon ichra jonim!



Dilafruz USMONOVA,
Zulfiya nomidagi Davlat mukofoti sohibasi

Хайдар Муҳаммад

БОБУР ЙИГИТЛИГИ

Ana shunday sho'x-shodon qo'shiqlar mualliflaridan
kimlarni bilasiz, degan savolimizga bergan javobingizda
taniqli shoir va dramaturg Haydar Muhammadning
nomini ham tilga olishingiz aniq. Chunki muallifning
«Bedanajon», «Toychog'im», «Xo'rozqand», «Mayna
va bolalar» kabi she'rlari
allaqachon siz bolajonlarning
sevimli
qo'shig'ingizga
aylangan.

Yaqinda
Haydar
Muhammad

bobongizning 60 yillik
ijod mahsuli to'rt jildlik
kitobga jamlanib, «MERIYUS» nashriyoti tomonidan
chop etildi. «Boburning yigitligi» deb nomlangan birinchi
jildagi buyuk bobomiz Boburning 12 yoshida taxtga
o'tirishidan boshlab,

OYIJONIM

Oyijonim ko'zida,
Hamisha bahor yashnar.
Shirin-shirin so'zida,
Hatto qishda qor yashnar.

Birga boqqa kirsam men,
Olma-yu anor yashnar.
Yonlarida yursam men,
Chaman-u gulzor yashnar.

Oyim agar chalsalar,
Sadafla dutor yashnar.
Qo'shiq aytib qolsalar,
«Alla»yu «gulyor» yashnar.

Oyijonim ko'zida,
Hamisha bahor yashnar.

Haydar MUHAMMAD

BIR KITOVKI, OFTOBOY

Qadrlı o'quvchilar! Bolalar qo'shiqlarini miriqib
tinglaganingizda yoki kuylaganingizda undagi ajoyib
satrlar xuddi sizning tilingizdan yozilganidek
tuyulishi barchangizni hayron qoldirsa kerak-a?!

TOYCHOG'IM

Sho'x-sho'x yurgan toychog'im,
Kishnab turgan toychog'im.
Kuchga to'lgın, toychog'im,
Hey, hey, jonivorim, chu!

Ikkalamiz toy bola,
Ikkalamiz to'y bola.
Yasanganmiz oy bola,
Hey, hey, jonivorim, chu!

Minsam, bir uchib ketgin,
Shamoldan ham o'tib ketgin,
Manzilga zumda yetgin,
Hey, hey, jonivorim, chu!

Barra beda beraman,
Silab, qashlab turaman.
Minsam yayrab yuraman,
Hey, hey, jonivorim, chu!



Bilimdon, qalbi qaynoq,
Mudom oqko'ngil, inoq.
Baxtiyor hamda quvnoq,
Sog'indim, aziz dildosh.

Har joyda bo'ling omon,
Bag'ri beg'ubor osmon.
Sizni qo'msayman hamon,
Mehribon, qalbi quyosh.

UCHDINGIZ OQQUSH MISOL

Yana o'yga tolaman,
Dildan xushnud bo'laman.
Ko'rsam zavqqa to'laman,
Qaydasiz ey, sinfdosh?!

Uchdingiz oqqush misol,
Bo'ling iymonli, halol.
Mehri cheksiz, so'zi bol,
Sog' bo'linglar, sinfdosh.

Umidaxon KARIMOVA,
Sergeli sanoat kasb-hunar kolleji 1-bosqich o'quvchisi



Ijodkorning zamonaviy
dramatik asarlarida inson
axloqi va ma'naviyati
masalalari qalamga olingan
bo'lib, ularni o'qib
o'zingizga tegishli xulosa
chiqarasiz, degan
umiddamiz. Shuningdek,
kitobdan o'rin olgan «Sehri
tanbur», «Hazilkash shoh»,
«Hunar o'rgangan bola»
kabi dramatik ertaklar ham
sizga manzur bo'ladi.

BOBOM YARATGAN BOG'

Ulkan bog' chetidagi olma daraxti soyasida uch
o'rtoq – Azamat, Karim va Ilhom kitob o'qib
o'tirishardi. Kitob Jaloliddin Manguberdi
haqida edi.

– Eh, katta bo'lsam, men ham
harbiy bo'laman. Ana shunda
o'qituvchimiz Muharram Mahmudovna, onam men
bilan faxrlanishadi, – dedi Azamat. – Onam meni doim
shunqorim, deb erkalaydilar. Bu ishonchni oqlashim
kerak-ku.

– Albatta, men ham onamning faxrlanishlarini
xohlayman, – subhatga qo'shildi Karim. – Lekin ota-
onam orzu qilganday farzand bo'lish uchun harbiy
bo'lishim shart emas. Men yaxshi o'qib,



kelajakda Marat Zokirovichdek o'qituvchi bo'laman.
Dadamning aytishicha, Marat aka qishlog'imizdagi
maktabni qurishda, uni yurtimizdagi eng ilg'or o'quv
dargohiga aylanishida bosh-qosh bo'lgan ekanlar.

Shu choq yengil shabada esib, tepa shoxdagi olma
«to'p» etib yerga tushdi. Ilhom uni qo'liga olib, mazza
qilib hidladi. Azamat bilan Karim ham olmaga tikilishdi.

Chinni piyoladek keladigan mevaning yarmi qizil, yarmi
esa qahrabodek sap-sariq edi.

– Juda ham chiroyli, xuddi suratda chizilgandek, –
dedi Karim.

– Hidining yoqimlilikini, ishtahani ochib yubordi, –
jilmaydi Azamat, – rosa shirin bo'lsa kerak.

Ilhom mevani qo'lida aylantirdi. Keyin olma
daraxtiga, so'ngra bepoyon boqqa qaradi-da:

– Men katta bo'lsam, xuddi bobomdek bog'bon
bo'laman, – dedi.

– Bog'bon?! – hayron bo'lib baravariga so'radi
o'rtoqlari.

– Ha, bobomdek bog'bon! – ishonch bilan dedi
Ilhom.

– Bog'bon bo'lish yaxshidir. Lekin u qahramon
bo'lolmaydi. Chunki bog'bonlik juda oddiy
kasb. O'qimasdan ham bu kasb egasi bo'lish
mumkin.

– Mana shu olmazorni mening bobom yaratgan.
Nihollarni ham uning o'zi parvarishlagan. Ular ko'chat
ekish, bog' yaratish, savobli ish, deyдилar. Hozir
yurtimizdagi hamma mevazor bog'larda bobom
yetishtirgan ko'chatlar hosil beryapti.

Ilhomning bu so'zlaridan xursand bo'lgandek
olmazor bog' shamolda shovullab qo'ydi.

Muhabbat HAMIDOVA

SPORT MAMLAKATI DEYSIZ

Darhaqiqat, bugun ulkan qurilishlar, yangilanishlar maydoniga aylangan diyorumizga, sport mamlakati, deya ta'rif bersak qarashadi. Chunki bugun qurtimizda jajji o'g'il-qizlarimizdan tortib, buvijonlarimizgacha sport bilan shug'ullanishayotgani hech kimga sir emas.

Istiqlol yillarida mamlakatimizda sportga qaratilayotgan e'tibor davlat siyosati darajasiga ko'tarildi. Ayniqsa, bolalar sportini rivojlantirish borasidagi sa'y-harakatlar salmoqli bo'lyapti. Uch bosqichli sport musobaqalarining tashkil etilishi, mamlakatning chekka hududlarida ham muhtasham sport inshootlarining qad rostlayotgani yurtimizda har jihatdan toblangan, mahoratli sportchilar yetishib chiqishiga zamin yaratmoqda.

Bunday ezgu ishlardan ruhlangan nuroniy onaxonlarimiz ham ibratli tashabbusga qo'l urdilar. O'zbekistonda xizmat ko'rsatgan xalq ta'limi xodimi, pedagogika fanlari doktori, professor Qumri opa Abdullayeva, oliy ta'lim a'lochisi pedagog-psixolog Farog'at opa Shodimetova singari faol buvijonlarimiz poytaxtimizdagi Alisher Navoiy nomidagi Milliy bog'da «E'zozli sportchi ayollar» guruhini tashkil etishdi. 2011-yilda «Yangiobod» mahallasida yashaydigan 7 nafar ayollar bilan ish boshlagan mazkur guruh safida bugungi kunda 170 dan ziyod turli yoshdagi xotin-qizlar sport gimnastikasi bilan shug'ullanib kelishyapti. Shu tariqa salomatliklarini tiklash,

jamoat ishlaridagi faolliklarini oshirish barobarida farzandlari-yu nabiralari ham o'rnatilgan bo'lishmoqda. «Yangiobod» mahallasida istiqomat qilayotgan o'g'il-qizlar ham sportchi buvijonlariga havas qilib mashg'ulotlarga kirishib ketishdi. Kelini, nabiralari bilan sport mashg'ulotlarini kanda qilmay kelayotgan Qumri opadan ibrat olayotgan buvijonlar ham guruhga qizlari, kelinlari, nabiralari boshlab kelishyapti. «Oqoltin», «Oftob» ko'chalarida yashovchi sportsevar

bolajonlar mahallalararo sport musobaqalarini, spartakiadalarni boshlab yuborishdi.

— Buvijon, juda barvaqt uyg'onib, sport mashg'ulotlariga borasiz, kun bo'yi ishdan bo'lasiz, oqshom chog'i ham tinim bilmaysiz, nimalardir yozib-chizib o'tirasiz. Shuncha kuch-quvvatni, g'ayratni qayerdan olasiz? — so'raydi «E'zozli sportchi ayollar» guruhi rahbari Farog'at opadan 14 yoshli nabirasi Aziza.

— Buning siri, eng avvalo, sportda, — deydi Farog'at opa nabirasini mehr bilan quchib. — Sport — salomatlik degani. Sog'lom inson esa kuchli, g'ayratli, shijoatli, hayotga, yashashga ishtiyoqmand bo'ladi. Shunday ekan, sport bilan do'stlashing, bolajonlarim...

Xayrli tashabbusning qanoti bor, deyishadi. Bu sportchi buvijon-u bolajonlarga havasmand sportsevarlar soni kundan kunga ortib boryapti. Qo'shni mahalla, tuman, shahar, hattoki viloyatlarda ham guruhning filiallari ochilyapti.

Siz ham bu tashabbusdan chetda qolmang, bolajonlar. Mahalladagi do'stlaringiz, dugonalaringizni jamlab, «Sportchi bolajonlar» guruhlari tuzing. Sport mashg'ulotlari bilan boshlangan har bir kuningiz unumli, maroqli, mazmunli o'tishiga biz kafil.

Feruza JALILOVA

Poytaxtimizda jismoniy imkoniyati cheklangan yoshlar o'rtasida dzyudo bo'yicha «Paralimpiya kubogi» musobaqasi bo'lib o'tdi.

YOSH POLVONLAR BELLASHUVI

O'zbekiston Milliy paralimpiya assotsiatsiyasi tomonidan jismoniy imkoniyati cheklangan yoshlarni sportga jalb etish va terma jamoalarni iqtidorli sportchilar bilan boyitish maqsadida tashkil etilgan musobaqada 80 nafardan ziyod sportchi g'oliblik uchun kuch sinashdi.

2012-yili London shahrida o'tkazilgan Paralimpiya o'yinlarida ham yurtimiz Sharif Xalilov kumush medalga sazovor bo'lgani dzyudoning jismoniy imkoniyati cheklangan yoshlar o'rtasida yanada ommalashishiga xizmat qilayotir.

Musobaqada poytaxtlik Salohiddin Jo'rayev, Shuhrat Boboyev, Islomiddin Mashayev, Odiljon To'landiboyev, buxorolik Sherzod Namozov, samarqandlik O'tkir Ne'matov va surxondaryolik Feruz Saidov o'z vazn toifalarida oltin medalni qo'lga kiritdi.

Qizlar bahsida buxorolik Umida O'rinova, Dilnoza Begiyeva, Sojida Savriyeva, Dilnavoz Rajabova, xorazmlik Yulduz Erkayeva va Gulruh Rahimova birinchi o'rinni egalladi.

Shoh
MUHAMMAD



JAJJI SHAXMATCHI

Tanishing: Toshmurod JILAVOV 2006-yil Navoiy viloyati, Karmana tumanidagi «Jaloyir» qishlog'ida tug'ilgan. Hozirda u tumandagi 14-umumta'lim maktabining 1-«V» sinfida a'lo baholarga tahsil olmoqda.



Toshmurod 4 yoshidan boshlab sportning shaxmat turi bilan shug'ullanib keladi. Yosh sportchi 2013-yil Navoiy shahrida 8 yoshgacha bo'lgan o'g'il bolalar o'rtasida o'tkazilgan shaxmat musobaqasida ishtirok etib, g'oliblikni qo'lga kiritdi. 2014-yil yanvar oyida Toshkent shahrida o'tkazilgan 8 yoshgacha bo'lgan o'g'il bolalar o'rtasidagi O'zbekiston chempionatida 6 ochko jamg'arib, kuchli o'tililkdan o'rinni egalladi. Bu bilan u joriy yilning iyun oyida poytaxtimizda bo'lib o'tadigan Osiyo birinchiligi musobaqasida qatnashish huquqini qo'lga kiritdi. Shuningdek, tengdoshingiz «Kamolot» shaxmat taxtasi musobaqasining tuman va viloyat bosqichlarida g'olib chiqib, respublika bosqichida qatnashadigan bo'ldi.

Biz Toshmurodga navbatdagi musobaqalarda omad tilaymiz.

Nigora JO'RAYEVA

ENG FAOL-U TIRISHQOQ, BO'LAMIZ BIZ TO'RT O'RTOQ

— Har yili maktabimizda «Balli, qizlar!» ko'rik-tanlovi o'tkaziladi. Tadbirni tomosha qilish orqali orastalik, kasb-hunar tanlashni o'rganamiz. Bu yil esa men ham tanlov ishtirokchisiga aylandim. — deydi Parizoda. Shuningdek, E'zoza-yu Dildora, Muslima ham bugun o'z iste'dodlarini namoyish qilishmoqchi.

Qayerda va qachon, nima gap o'zi, deysizmi? O'zimizning poytaxtda, Shayxontohur tumanidagi 41-umumta'lim maktabining 4-sinf qizlari bellashuvga shaylanibdi. Ustozlari boshchiligidagi «Balli, qizlar!» deb nomlangan tadbir tashkil etib, shartlarni saralashibdi. Birinchi shart odatdagidek tanishtiruv bo'lib, unda barcha

ishtirokchilar she'riy tarzda o'z qiziqishlari va oilalari haqida ma'lumot berdilar. 4-«J» sinf o'quvchisi Dildora Toshmuhammedova o'zini ingliz tilida tanishtirib, bu fandan olgan bilimlarini yig'ilganlarga namoyish etdi. Savol-javob shartida esa 4-«B» sinfining a'lochi o'quvchilaridan biri E'zoza Rixsitillayeva barcha savollarga topqirlik bilan javob berdi. Ayniqsa, bellashuv ishtirokchilarining erkin mavzuda qo'shiq aytib, sahna ko'rinishlarini namoyish etishi barchaga xush kayfiyat ulashdi.

Tadbir yakunida E'zoza eng faol ishtirokchi, Parizoda eng tirishqoq qiz, Muslima eng orasta qiz, Dildora esa tadbir malikasi, deb topildi.

Tanlov so'ngida ma'naviy-ma'rifiy ishlar bo'yicha direktor o'rinbosari Ziyoda opa Tosheva so'zga chiqib, o'quvchi-qizlar a'lochi, namunali xulq egasi bo'lish bilan birga, orasta, epcil va albatta, keng dunyoqarashga ega bo'lishlari lozimligini aytib o'tdi.

Istagimiz, yurtimizdagi har bir ta'lim maskanidan barkamol avlodlar yetishib chiqsin!

Sayyora QODIROVA



BO'SH O'TIRMAY, BOSH QOTIR!

Bo'yiga: 1. Tavallud kuniga 120 yil to'lgan o'zbek adabiyotining ulkan namoyandasi, o'zbek romanchiligi asoschisi.

2. Atoqli san'atkor, kino va teatr ustasi, O'zbekiston xalq artisti.

8. Ma'rifatparvar arbob, Turkistondagi jadidchilik harakati namoyandaligidan biri, ilk darsliklar muallifi, ustoz muallim, qatag'on qurboni.

9. Atoqli yozuvchi, olim, davlat va jamoat arbobi, birinchi o'zbek professori, qatag'on qurboni.

10. Mamlakatimizda ilk Xotira maydoni tashkil etilgan shahar.

Eniga: 7. Hayot, insonning yashab o'tgan davri.

15. Zurriyot, ajdodlar davomi.

Diagonal bo'yicha o'ngga:

14. Mangulikka daxldor jasorat.

Diagonal bo'yicha chapga: 14. Faylasuf, ajdodlarimiz falsafiy merosini o'rganishga bag'ishlangan ilmiy asarlar muallifi, Beruniy nomidagi Davlat mukofoti sohibi, akademik.

Zanjir holda: 3. Voqea-hodisalar davrlariga ko'ra aks ettirilgan nodir manba.

4. Mangulik, cheksiz davom etish.

5. O'tmishni o'rganuvchi fan.

6. Algebra faniga asos solib, hisob ilmidagi yangiliklar


yaratgan o'rta asr qomusiy allomasi, vatandoshimiz.

11. O'zbek shoirasi, lirik she'r, doston va qissalar muallifi.

12. Asarlarida vatanparvarlik, insonparvarlik g'oyalari ilgari surgan XIX asr qoraqalpog' shoiri.

13. Ustoz san'atkor, o'zbek estradasi namoyandasi.

Tuzuvchi: Husan O'RIPOV



Parvanda qiladi!



Ishtaha ochuvchi pishloqli salatimiz sizga va oila a'zolaringizga birdek yoqishiga ishonamiz. Uning tayyorlanishi oddiyligi bilan ham boshqalaridan ajralib turadi. Marhamat, bu salatni tayyorlab ko'ring, mazasi og'zingizda qoladi.

PISHLOQLI SALAT

Kerakli masalliq: 200 gramm pishloq, bir bo'lak sarimsoqpiyoz, 4 dona qaynatilgan tuxum, 4 oshqoshiq mayonez, ta'bga ko'ra tuz.

Tayyorlanishi:

Pishloq va qaynatib pishi-



rilgan tuxumni qirg'ichning yirik tishidan o'tkazamiz. Sarimsoqpiyozni mayda qilib tuyib, barcha masalliqni mayonez bilan qorishtiramiz. Mazali va antiqa salat tayyor.

Yoqimli ishtaha!

NARGIZA tayyorladi

5-may 2014

Muassislar:

O'zbekiston Matbuot va axborot agentligi, O'zbekiston Respublikasi Xalq ta'limi vazirligi, «KAMOLOT» yoshlar ijtimoiy harakati Markazi Kengashi, «SOG'LOM AVLOD UCHUN» boshqarmasi qarashli bo'lgan xalqaro xayriya fondi.

Bosh muharrir
Feruza ADILOVA

Gazeta O'zbekiston Matbuot va axborot agentligida 0208-raqam bilan 2007-yil 2-fevralda ro'yxatdan o'tgan.

TAHRIR HAY'ATI: Omonulla YUNUSOV, Abduqani XOLBEKOV, Bahodir G'ANIYEV, Svetlana INOMOVA, Murtazo SULTONOV, Zoir ISAJONOV, Feruza JALILOVA, Sa'dullo TURSINOV (Bosh muharrir o'rinbosari), Feruz MATYOQUBOV (mas'ul kotib), Sobitxon TURG'UNOV, Zikrilla TESHABOYEV

Navbatchi muharrir
Sayyora QODIROVA
Rassom
Feruzbek KAMOL o'gli
Dizayner
Olovuddin O'RIPOV

Manzillimiz: Toshkent shahri, Navoiy ko'chasi, 30-uy. Indeks: 100129. Obuna indeksi: 198. e-mail: info@tongyulduzi.uz www.tongyulduzi.uz

Tel./faks: 244-63-08
Tel./faks: (99871) 244-38-10

«O'zbekiston» NMI'da chop etildi. Tahririyatga kelgan barcha qo'lyozmalar tahrir qilinadi, mualliflarga qaytarilmaydi. Haftaning dushanba kuni chiqadi. Shakli A-3, 2 bosma taboq.

ISSN 2010-6092
Adadi - 53244
Buyurtma N: J 9814